

Papur y Bwrdd

4 Rhagfyr 2014

| | |
|--|--|
| Teitl y Papur | Ail-benodi Deilydd Dyletswydd Gwarchodfa Dyfrdwy |
| Cyfeirnod y Papur: | NRW B B 87.14 |
| Cyfeirnod y Papur: Noddwr: Awdur: | Tim Jones Dave Andrew |

| | |
|----------------------------|---|
| Pwrpas y Papur: | Penderfynu |
| Argymhelliad: | Argymhellir bod y Bwrdd yn: Penodi Cyfarwyddwr Gweithredol Gogledd a Chanolbarth Cymru yn Ddeilydd Dyletswydd Gwarchodfa Dyfrdwy. |
| Angen Penderfyniad: | Penodir y Deilydd Dyletswydd newydd i'r rôl yn ffurfiol o'r 1 Rhagfyr 2014. |

| | |
|--|---|
| Effaith: Noder – mae'n bosibl nad yw pob pennawd yn berthnasol i'r pwnc | <p>Effaith ar yr Amgylchedd: Mae cydymffurfio â gofynion Cod Diogelwch Morol Porthladdoedd a rheoli gweithgarwch morol yn effeithiol o fewn Gwarchodfa Dyfrdwy yn diogelu llongau ac yn lleihau'r potensial o achosion o lygredd morol o fewn yr aber.</p> <p>Effaith ar yr Economi: Bydd gweithgarwch morol diogel yng Ngwarchodfa Dyfrdwy o gymorth ar gyfer gweithgarwch cyfredol ac arfaethedig sy'n gysylltiedig â Phorthladd Mostyn, gwaith Canolfan Cynnal a Chadw Rhanbarthol fferm wynt RWE ac allforion adenydd Airbus A380. Mae cyfanswm gwerth y nwyddau a'r gwasanaethau sy'n symud trwy'r ardal yr ydym ni'n gyfrifol amdani yn fwy na €1 biliwn bob blwyddyn.</p> <p>Effaith ar y Gymuned: Mae gweithrediadau morol diogel yn hwyluso cynaliadwyedd dros 2000 o swyddi llawn amser lleol a rhanbarthol sy'n gysylltiedig yn uniongyrchol â diwydiant sy'n ddibynnol ar ddefnydd diogel o ardal y Warchodfa.</p> <p>Effaith ar Wybodaeth: Dim effaith uniongyrchol.</p> |
|--|---|

Pwnc

1. Mae Cod Diogelwch Morol Porthladdoedd (Yr Adran Drafnidiaeth 2012) yn mynnu bod Awdurdodau Harbwr Statudol yn penodi Deilydd Dyletswydd, sydd â lefel briodol o awdurdod, er mwyn sicrhau bod gofynion y Cod yn cael eu bodloni.
2. Y Prif Weithredwr sydd wedi ymgymryd â'r swydd hon ers i'r rôl gael ei chymeradwyo gan y Bwrdd yn ei gyfarfod ar 22/02/2013.
3. Bellach cynigir bod y rôl hon yn cael ei throsglwyddo i Tim Jones, Cyfarwyddwr Gweithredol Gogledd a Chanolbarth Cymru a fydd o ganlyniad yn cynnwys goruchwyliaeth uniongyrchol o fewn y Gyfarwyddiaeth leol.

Crynodeb

4. Roedd Gorchymyn Corff Adnoddau Naturiol Cymru (Swyddogaethau) 2013 yn trosglwyddo rôl Gwarchodfa Dyfrdwy gan gynnwys cyfrifoldebau'r awdurdod harbwr statudol a'r awdurdod goleudy lleol i CNC. Mae'r Cod Diogelwch Morol Porthladdoedd (CDMP) yn benodol yn ei gwneud yn ofynnol i benodi Deilydd Dyletswydd gyda chyfrifoldeb am sicrhau cydymffurfiaeth â gofynion y cod. Y Prif Weithredwr sy'n dal y swydd hon ar hyn o bryd. Mae gofynion y cod yn cael eu bodloni ar hyn o bryd ac mae digon o arbenigedd technegol yn lleol i gefnogi deilydd y swydd.

Cefndir

5. Mae'r CDMP yn berthnasol i bob awdurdod harbwr yn y DU sydd â phwerau a dyletswyddau statudol. Nid yw'n god statudol ond mae'n gosod y safon a ddefnyddir i fesur pob awdurdod harbwr. Yn gyffredinol, trwy gydymffurfio â'r cod, mae awdurdod yn dangos ei fod yn cyflawni ei rwymedigaeth i sicrhau mordwyo diogel drwy arfer gweithredol da o fewn ei awdurdodaeth. Mae aelodau Bwrdd CNC ar y cyd ac yn unigol yn atebol am ddiogelwch morol o fewn Gwarchodfa Dyfrdwy. Gallant benodi Deilydd Dyletswydd sy'n atebol ar eu rhan am reoli gweithrediadau diogel ac effeithlon yn yr harbwr.
6. Mae rheoli gwaith y Warchodfa o ddydd i ddydd a chyflawni ein cyfrifoldebau statudol ar hyn o bryd dan ofal y rheolwr Dyfrffyrdd. Darperir cyngor morol technegol a gwasanaethau Harbwrfeistr Cywir Cymwysedig ar sail contractio i mewn gan Strategic Marine Services. Yn yr un modd, mae gwaith cynnal a chadw rheolaidd a brys afreolaidd ar gyfer y 60 o gymhorthion mordwyo sydd wedi'u lleoli ledled ardal y warchodfa yn cael eu darparu gan Marland Marine Services.
7. Prif ddisgwyliad y cod yw datblygu a gweithredu system rheoli diogelwch morol (SRhDM) ar gyfer gweithrediadau o fewn yr harbwr. Mae'r cod yn ei gwneud yn ofynnol penodi deilydd dyletswydd sy'n atebol am reoli gweithrediadau yn ddiogel, a Pherson Dynodedig i ddarparu sicrwydd annibynnol i'r deilydd dyletswydd ynghylch gweithrediad effeithiol y system rheoli. Bydd y Deilydd Dyletswydd yn adrodd yn ffurfiol i'r Bwrdd bod yr awdurdod yn cydymffurfio â'r Cod ac yn cyflawni ei gyfrifoldebau cyfreithiol yn foddhaol. Nid oes unrhyw newid arfaethedig i swydd y Person Dynodedig sy'n cael ei ddarparu ar hyn o bryd gan yr Ymgynghorydd Iechyd a Diogelwch Rhanbarthol.

Y Camau Nesaf

8. Bydd trosglwyddo rôl Deilydd Dyletswydd i Gyfarwyddwr Gweithredol Gogledd a Chanolbarth Cymru yn cynnal lefel o gyfrifoldeb sy'n briodol i ofynion y Cod a'r lefel angenrheidiol o awdurdod i sicrhau bod digon o adnoddau ar gyfer cyflawni dyletswydd statudol CNC dros Warchodfa Dyfrdwy. Bydd hefyd yn dod â'r cyfrifoldeb hwnnw yn agosach at y gweithrediadau o ddydd i ddydd o fewn y Warchodfa.

Risgiau

9. Mae system rheoli Diogelwch Gwarchodfa Dyfrdwy (SRhDGD) yn system effeithiol sydd wedi bod ar waith ers rhai blynedd ac wedi bod yn destun archwiliad. Mae'r risgiau diogelwch morol yn gyffredinol yn cael eu rheoli'n dda ac ni ddisgwylir unrhyw broblemau sylweddol os bydd y trefniadau presennol yn parhau. Fodd bynnag, os na wneir y penodiad a argymhellir, yna bydd CNC yn torri'r CDMP. Byddai hyn yn peri risg sylweddol i enw da ar unwaith, a byddai, dros amser, yn erydu effeithiolrwydd y SRhDGD presennol gyda risg i ddiogelwch morol yn sgil hynny. Gallai hefyd arwain at sancsiynau'n cael eu gosod yn erbyn CNC gan Asiantaeth y Môr a Gwylwyr y Glannau fel y corff rheoleiddio diogelwch morol Cenedlaethol.
10. Bydd diffyg cydymffurfio clir â gofynion y Cod os na phenodir Deilydd Dyletswydd. Bydd y newid arfaethedig o ran y Deilydd Dyletswydd yn caniatáu i CNC gynnal y lefel briodol o oruchwyliaeth ac awdurdod i gyflawni ein dyletswyddau statudol yn llawn fel Awdurdod Harbwr Statudol ac yn anstatudol (ond serch hynny *de facto*) y gofyniad i gydymffurfio â'r CDMP yn ei rôl fel Gwarchodfa ac Awdurdod Goleudy Lleol ar gyfer aber yr afon Dyfrdwy.

Goblygiadau Ariannol

11. Nid oes unrhyw oblygiadau ariannol ychwanegol, y tu hwnt i'r rhai sy'n gysylltiedig â'r trefniadau presennol, yn codi'n uniongyrchol o'r cynnig.

Cyfathrebu

12. Mae'n ofynnol ein bod yn cyhoeddi ein bod yn cydymffurfio'n llwyr â gofynion y Cod, gan gynnwys cadarnhau pwy yw'r Deilydd Dyletswydd. Mae'r gofyniad hwn yn cael ei grynhui yn y Canllaw i arfer da ar weithrediadau morol porthladd (A guide to good practice on port marine operations - Yr Adran Drafndiaeth 2013).
13. Ar hyn o bryd rydym yn cyhoeddi ein cydymffurfiaeth â Chod Diogelwch Morol Porthladdoedd ar ein gwefan a byddwn yn adolygu'r ddogfen bresennol unwaith y ceir cadarnhad bod y Bwrdd wedi trosglwyddo rôl y Deilydd Dyletswydd.

Asesiad o'r Effaith ar Gydraddoldeb

14. Mae gofynion y Cod, fel y dangosir uchod yn adran 2.2.19, yn cyfyngu'r rhai a all gael eu penodi i'r rheini sydd ar lefel Cyfarwyddwr.

Mynegai i'r Atodiadau

1. Adran allan o God Diogelwch Morol Porthladdoedd.